

## 2 Mbiturus

### *Nda'ya*

<sup>1</sup> Kyagha deleewar dāba ya a har Siman Mbiturus, mafarha tē tēthlōnda Yeeso Kārēsti, a fīngya fārgha kākafek kēla kēm hu nggayid Faar nēm tē tēhārēkrha Yeeso Kārēsti.

<sup>2</sup> A fārangga Faara nggayirha kun tē tsawud dēdemnggirha hangga hu sēnda Faara tē yi Yeeso Chinēm.

### *Sēnu aadwa tē wurrē wa*

<sup>3</sup> Hu sēsēmndēghēn, fārang Faara ēngya kēm na minnēm ka a tsawum nafiya na a takkwaghēn tē kākafekkirha. Thlōdēm ēnggini heu ya kēsēr ka sēnnēm ndēn, ndēghēn aagha kēm ahu mamnggitghēn bā tē nggayidghēn.

<sup>4</sup> Hu ēngginiya ndēn fēr nēn dēf miighēn na ngga a kēm, kēsēr ahur ndan ni, ndēn nun mbang wumteena tēghēn hu tar Faarghēn, tēkēm wal hērēkrha nun ahu tsawud mbēlfeerha yi kēshiirha, bāngga sunad ēngya bā dēdamēn dēdamēn.

<sup>5</sup> Nanēn kee, ndeeman yid nun na a chikka fēr kākafekkid nun tē nggayirha, nggayiddi kēm tē chik sēnda.

<sup>6</sup> Aten sēndēnun chighamadghēn tē kēs alteena, a kēsang dūn alten nun kēm kērsun, a kērēs dūn nama a tērēm Faara,

<sup>7</sup> a nadun a tērēm Faara, nama ndan hai. A nadun a na ndan hai kēm nggēmama ndan.

<sup>8</sup> Anadun a ēna ēngginiya, nun naarha hwas-hwas tē chik sēnda chinēm Yeeso Kārēsti.

<sup>9</sup> Amma kala Niifa kədfeng ngga əngginiya mbə a namana də inggun wa. Mbədfang də tə ndaarha tsabang nda dīmiyidghən də yi kaar.

<sup>10</sup> Nanən kee shayina, chighama dərha mbee də tənən kyad ndaarha nafiya ni kun aah na nda təkəm wurna Faara. A nadun a tsaurha kiya, mbun tam fəla hai wa.

<sup>11</sup> Tərgha na Faara a kyadang kwamana kun ahu kutəyirha də mbuwa ngwalarha yi chinəm tə təhərəkra Yeeso kərəsti.

### *Dəf teena tə labar Faara*

<sup>12</sup> Nanən kee, niya naarha dālang ənggini kun teena ya kətsar, ko nanən səndun kanda, tə kəm tsaudun tə shembe ahu fərəkəkafekkid dī thlənun.

<sup>13</sup> Ahu numad na məməl ni a nee naarha dālanggən kun teena a bal dī tə yibrha fa.

<sup>14</sup> Kəsər ndeegha Chinəm Yeeso Kərəsti tsəbaku tətani a mal kəshidda ni ya.

<sup>15</sup> Nanən kee, niya əna taara kaan tənun naarha dāl ənggini teena ya a akwasamaddi wiini.

<sup>16</sup> Mbə asədaarha tsəna nda tə thladwayirha takkwa nan aten bad Chinəm Yeeso Kərəsti ba wa. Awo, asədaarha ni yi kəkafek, kəsər nadan mamnggitghən tə yid nan.

<sup>17</sup> Naghan sə a mbədi a sayiddi manang na nda tə mamnggit Faara na chindi, sək nan urarha hai ahu mamnggit kutəryid Faara, “Waana niya nggəmni, niyi a tək mbəndəghən fa kaan”.

<sup>18</sup> Kan tə alten nan sək dan uraddi a talara hai a sayiddi nanan təghən a wumnda tə pedənda.

<sup>19</sup> Ənggini heu ya kəkafek kyadang də 'ya kəm thləkna annabiya kaar atənggən. Nanən kee tama dəf teena nəm ngga ahu 'ya chirelth nanda, kəsər

na palth ndan kəla patilla na a djaara hai ahū wula pa dalthgha mbərha hai, a sayiddi kəm na Wufəlngar Tsar a djaara hai ahur nun.

<sup>20</sup> Ahu əngya heu, a sənunsə tə ndaarha, mbə labara sə thləkna annabiya hu deleewar Faara tsauka yi hutən ndan wa.

<sup>21</sup> Kəsər 'wawa labaara kyarha ba a mii niifa wa, amma a mii annabiya shik na Səsəna tə Pedənda kanda thlək 'ya ndaana Faara.

## 2

### *Fa nggabaya annabiya tə famaləmgya*

<sup>1</sup> Amma a faryini annabiya fa nggabaya kyanda ahur nafiya Isəreela ba. Nəghən kee kəm nanənya na famaləmgya fanggabaya a narhasə ahur nun. Tə ndəndəl yid ndan na nda a barha ba tə tsaharhaha pak bəbee, tsahang nggabarha nda fiya ha na a səbanggən kanda də, kar Chinəm nda fa hərəhangga yibəd ndan. Ahu ənaarha kiya nən a bəng mərri kanda fa ba.

<sup>2</sup> Fiya hangga na nda a takkwa kulafayirha tə sarang nda kwaman kəkafek də.

<sup>3</sup> Hu sunad ndan na nda huk kun tə labara na mbənggən yi nggabaarha. Amma ka kətəm 'wanda teena ngwang nda kumarha kanda sə, kəsər shiwa Faara na a bələng kanda wa.

<sup>4</sup> Kəsər ko fathləngya Faara ni ənagha dimi mbə Faara a malang kanda wa. A meyedghən nən a kənanng kanda tə wuyiwurra muwang kanda hu hwanga də, a mbərha də na kudimnggən wulghən kaan, a mbədani na nda a kəla far ngwa kumarha fa.

<sup>5</sup> Malangwa Faara nafiya kætəm wa, amma malang dē Nuhu ndəghən na pər Labar nggayirha tē fīngya nafiya məd, a sayiddi banən ba tē aam afa afa hu kəshiirha ba hwanggən fiya dē mbuwa takkwa Faara.

<sup>6</sup> Tsanggən wupəriya Saduma tē Nggomara fishe, tsauka ənsakhrha bagha katərarha hai tē fīngya kargha takkwa Faara fa.

<sup>7</sup> Hərghang Faara Lutu niifa na chahal, səbna hurghən dē tē tar kulafayid nafiya na a thləmadghən.

<sup>8</sup> Kəsər ka nggayid niifa, tsauka ahur ndan ka fad dathla mbərha fa hai. Nagha nggayid haredghən a səbrha dē aten yamid takkwa ngyakhrha nən a naarha tē səkrha.

<sup>9</sup> Nanən kee Faara səndə kwamandı na a hərghang nggən fīngya na a takkwaghən ma kəkərta, kəs nafina nən ha mbuwa tē nggayirha fa hu tsətsəlla kəl far ngwa kumarha.

<sup>10</sup> Mbə kəla fīngya kyagha hu sunad thlu farha hai ma wa, na nda sar kutəryirha. Nafini ya fa nggabaya ni, mbə shilee sə a yid ndan wa. Na nda naarha tərang altendan sə. Mbə 'yasə na nda tərəmnda wa, kəl yakh 'yar əngya na məmanggən a talara.

<sup>11</sup> Ko fathləngya Faara ni tafad ndan kanda na kəkanglang tē səsəmnda fa ma famaləngya fanggabaya, 'yar wanda kanda a mbed Chinəm wa.

<sup>12</sup> Amma nafini ya na nda thlək labara mbuwa ngga aten əngya sənangwa nanda hai. Na nda kəla mabiya na hee mbuwa tē numarha fa, na nda a takkwa suna 'ya na mid ndan kee, nggət

nanda kanda kəsər a kəsang ngganda kanda bəlang ngganda kee. Na nda a mərə kəla mabiya na a hee.

<sup>13</sup> Kəla səsang nanda fiya, na nda a səsang kanda kee kəm. Tərgħa nda tək mbənda fa 'yani na ngga a yanfara. A nanda a həbrħa təkun, na nda dərħa mbeedə tək tək mbənda fa tək kwaman hukrħa, səbang ngganda kun də kyangganda kun hu shilee hai.

<sup>14</sup> Na nda lələgdə tək əna kulafayirħa hu yid ndan, mba nda tam malang dīmīyirħa wa. Na nda a huk fīngya mbuwa tək shembe hu fərkəkafek. Mbang nda kədə əngya tərna mid ndan kaan. Bana Faara ngwang kumarħa kanda sə.

<sup>15</sup> Malang nda kwaman kəkafek kyath nda hai takkwa kwaman Mbala'am nda wan Mbeyo na midghən sə kəna tar mbəlfērħa.

<sup>16</sup> Yanang nda aten əna dīmīyidghən, har kwara ma ndən 'wagħa ndikrħa fa kəla niifa, nana midghən sə a ishānggən annabiya hai ka tar nuryidghən.

<sup>17</sup> Nafiniya suhwadya ni mbuwana aama sə, təkəm wufiyya ni na bəreurħa pengdə. Taksang Faara mbərħa kanda sə na wulghən tikdik.

<sup>18</sup> Kəsər na nda taala tək thlək palth nuryirħa tək yakh əna kulafayirħa, na nda naarħa ləm fiya fa hərəkka məngwa ha hu malang nda dīmīyid ndan.

<sup>19</sup> Dəfang mee kanda hai yi wal alteena, amma kanda tafad ndan mafaya ni, kəsər fiya tafad ndan mafarħa ni kanda aten 'ya kalgha kanda mu.

<sup>20</sup> A wal fiya hərəkħa hu tar mbəlfed kəshiddiyya hu sənda Chinəm tək Təhərəkħa Yeeso Kərəsti

nggørgħa nda tanggølla sahai, kaldø kanda mu, na nda a søbrħa dø kaan a mii ngwaladghøn ma katøradghøn.

<sup>21</sup> Nøn a tsawang kanda fa ngga a kyawa nda søn kwaman nggayirħa wa, ma sønggønda nggørgħa nda wutta samarħa dø kar ønda nda fa malang nanda kanda hai a tsawa nda chahal.

<sup>22</sup> Aten ndan ni løghødna køkafekkid karapudfi ndagħa, “Wud wudø ten fønekrøghøn dø,” tø køm, “Fanang nda kølengarra, nggørdø wutta hu yabarħa dø.”

### 3

#### *Døf mee yi bad Chinøm ba*

<sup>1</sup> Pashiyina nggømni, øleewar nani ya yi søri chireethleng ni kun dø. Kanda kyab niyi a dølång ønggini kun teena 'wa nun sønda, køsø a førang kaali ni kun na a numon ngga.

<sup>2</sup> Na minnasø a døl labar annabiya nun in na chahal kaar tø 'ya ndaana Chinøm tø Tøhøøkřħa thløk nøn a mii fathlønggi nun.

<sup>3</sup> Kamdø tøta na a 'wa sønda nun sø tø ndaarħa, a mii ngwala køshirħa na fa wa faya a baarħa ba, na nda a wa kun, na nda a takkwa suna fad ndan.

<sup>4</sup> Na nda a ndaarħa, “Ai labar bad dæba døfnøn miighøn? Ka mønna chichi yi nøm dø kaar, amma øngya heu bølghanda køla nadghøn ka øna nanda køshirħa.”

<sup>5</sup> Amma ønagħa ndan thlømøn ka a mbødangga labar Faara kanda ønanøn talara, tø køm hu aama ni sø øna nanda køshirħa, køshirħa køm muwangga aama madufu.

<sup>6</sup> Tə aam da ni kəm a fardi hwangna aam afa afa kəshiirha də.

<sup>7</sup> Amma tə labar da ni kəm, nda talara tə hweede nasə nanənya, na nda a kəla far mōrrə ndan fa tə waarha. Dəfang nanda kanda də ka far ngwa kumarha na nda a ənan nda fiya mbuwa tərəm Faara, ka a bəlangganda kanda də.

<sup>8</sup> Amma shayina nggəmni a mbəđang əndi kun na tal ya wa. A fad Chinəm beena tal nəghən kəla huraya haru kum, huraya haru kum kəm nəghən kəla beena tal.

<sup>9</sup> Chinəm mbə naarha samma-samma a nadə a ləđang nda dəf miighən wa, kəla na fingya a numarha wa. A meyedghən nəghən a kərəsta tə kun, mbə midghən sə a mərgha niifa ko tətal ahur nun wa, amma kowunni na a malanggən dimiyirha.

<sup>10</sup> Amma a fara na Chinəm a bərhəba nən a naarha kəla bəd ngaara bə. Na talara a sahəta ləđangga mbeela fərah amshi, əngya na ahurghən na nda a njirha də tə waarha mərə nda də, kəshiirha kəm tə əngya na ahurghən heu nən a sahəta.

<sup>11</sup> Tsaunən na nda a bəlang əngya heu kiya, nun a tsaurha tur yanggi nafiya? Kamdə a tsawun chahal tə tərəm Faara,

<sup>12</sup> kəla na bəd Faara bə a kukwasang kun fa, non a tsang fardi ya bəgha bə wet. A fardi ya na nda a njang talara tə waarha, kala əngya heu ənana nda talara tə hweede sə na nda a ngətta də.

<sup>13</sup> Amma ka dəf miighən ənanən nəghəm a kəla weerinda talara tə hweede fa, a mbəda ni na nggayirha a naarha sə.

### *Ngwala mii labara*

<sup>14</sup> Nanən kee, shayina, nanən nuwun a kəla farda fa ya, djitima bagha wal kun chahal, kula ən 'yaara a fad nun, tsawun dədəm təghən.

<sup>15</sup> Dalama teena hai tə ndaarha, 'ya ənagha ndən na Chinəm a kərəsta tənə fiya wal kwaman hərəkrha. Əndə 'wana shad nəm Mbulus chireeth-leng kun də tə thladwayiddi fərang na Faara.

<sup>16</sup> Nən naarha kaala sə aten ənggini 'yahu deeleewarghən heu. Ahu deeleewar yighən na əngya sə na səndəghən pədaghən, ndən na fingya fiya djidangwana 'ya kanda tə fingya kəsang ngwa ten ndan kyakhrang labarda hai ndanən. Na nda ənərha kee tə fingya labara hu deeleewar Faara. Hu ənəarha kiya na nda aang mərri fad ndan fa ba.

<sup>17</sup> Tsaunən kee, pashiyina, 'wanun in səndun əngginiya, kwarama amana nafini mbuwa takkwa ngyakhrha thlulang tennun dun kədeng mbəd ishshi nun.

<sup>18</sup> Amma ishama hu nggayirha tə sənda Chinəm təhərəkrha Yeeso Kərəsti. Mamnggirha heu a tsauka yighən nanənya ta pakwandə. Atsaukake.



## **Hona Bible**

### **The New Testament in the Hwana language of Nigeria: Hona Bible**

copyright © 2023 The Seed Company in collaboration with Language  
Developers and Bible Translators Association

Language: Hona (Hwana)

Contributor: Language Developers and Bible Translators

This translation is made available to you under the terms of the Creative  
Commons Attribution Share-Alike license 4.0.

You have permission to share and redistribute this Bible translation in  
any format and to make reasonable revisions and adaptations of this  
translation, provided that:

You include the above copyright and source information.

If you make any changes to the text, you must indicate that you did so in  
a way that makes it clear that the original licensor is not necessarily  
endorsing your changes.

If you redistribute this text, you must distribute your contributions  
under the same license as the original.

Pictures included with Scriptures and other documents on this site are  
licensed just for use with those Scriptures and documents. For other uses,  
please contact the respective copyright owners.

Note that in addition to the rules above, revising and adapting God's Word  
involves a great responsibility to be true to God's Word. See Revelation  
22:18-19.

2025-07-18

---

PDF generated using Haiola and XeLaTeX on 26 Jul 2025 from source files  
dated 18 Jul 2025

d942b897-c376-5386-bfaf-e0ce21c59136